





LOX BWAN PA GAUX RHAWM

LOX PA KRAI YESUX, MAI: LOX SIDIEX NAWH

Grawh grawng pa koe dauh phuk lai in, mawh lox pa teei dauh phuk lai Siyiex pa mawh gum lox Krai Yesux, sonsang tawng gau pwi pa simie tix tawng, ka lox pa sidiex gau Yesux Khrit heue.

Num pa hoik luan ra rheng dix, Yesux lih hoek ka dauh meung Esarilax heue. Yam in rieang khix pa shao pwi ka pieang haktiex khawm uik, mawh pa sawn khixnum, pa jah Yesux tix lih hoek pieang haktiex in heue. Krax im ju Yesux, mai: lox sidiex gau Nawh, kieh pwi haktiex tieh loh tix, lheu koe pa mhawm khaing pwi pieang haktiex khawm uik heue.

Gum lox sidiex Nawh cao, pa ting ceu, mawh grawng meung Siyiex, mai: grawng pa pon luan kawn phimap, khaing phimap yuh ka mawx, mai: grawng pa pon tix hoek, ka dauh meung Siyiex yuh ka mawx heue.

Kaing: ting pa koe grawng dauh phuk lai in, ang lai mawh sonsang pon laig dauh been li, mai: ang mawh son sang laig ka dauh cubaw kawn pwi khankix, mawh sonsang tawng ex ka gum lox Siyiex pa im ju, mai: sonsang kieh ex tawng grawng pa ting ceu krax yum rhawm heue.

LOX BWAN PA GAUX RHAWM

LOX PA KRAI YESUX, MAI: LOX SIDIEX NAWH

စာမူခွင့်ပြုချက် - ၂၀၁၅/၂၀၀၀ (၃)
 မျက်နှာဖွဲ့ခွင့်ပြုချက် - ၁၈၂/၂၀၀၀ (၃)
 ထုတ်ဝေသူ - ဦးစောအောင်မြင်း၊ ၁၄၃/မင်းရဲကျော်စွာလမ်း၊
 လမ်းမတော်မြို့နယ်၊ ရန်ကုန်မြို့။
 ပုံနှိပ်သူ - ဦးစောဖေဝါ၊ ဂိုးဖေါင်ဖုန်းတိုက်၊
 ၃၉၆/ဗိုလ်ချုပ်လမ်း၊
 လမ်းမတော်မြို့နယ်၊ ရန်ကုန်မြို့။
 တန်ဖိုး - ၅၀ ကျပ်
 အုပ်စု - ၅၀၀၀
 အကြိမ် - ပထမအကြိမ်

Wa

PHUK LAI SIGANGSI PA AH NAN:


Phuk lai sigangsi, koe ra phuk, pa kok mawh phuk lai pa prim, mai: phuk lai pa khraox heue.

Gum lox pa koe daux phuk lai sigangsi pa ah gum lox bwan an, sang ah ka sijax mukheu pa deuh Siyiex, phan ang mawh nan, lox sijax mukheu pa deuh Siyiex sinax kawn pwi mai: Siyiex heue.

Gum lox pa kaux sijax, pa tawm Siyiex tix deuh, daux phuk lai sigangsi pa prim, ang koe pa lud tix mu kawx, kieh can pwi pa hawt yuh ku kaux, pon bwan son: heue. Vieang mawh nan, ka daux phuk lai sigangsi pa prim, kyai grawng: kawn pwi ang hawt yuh lox tawm: ping nyap Siyiex, mai: tuktieak ka Siyiex heue.

Gum lox sijax mukheu pa deuh Siyiex dau phuk lai sigangsi pa khraox, mawh pa deuh num: tix ka pieang, pa kham geu Yesux tix yum ka pieang khaox lhak heue. Lox sijax mukheu an, mawh pa pon kawn pwi krax taoh kheu Yesux Khrit, mai: pa pon sin ju meung Siyiex heue. Can pwi pa yum rhawm ka Yesux Khrit, mawh kheu hoik kham: geu Yesux ka son phimap kawn pwi, ka pieang khaox lhak, tak sang: fah rhawm: ka grawng hoik luan khaing phimap leeing ju heue. Mawh kheu nan, ex hoik pon ju leeing ju pa tawx Siyiex, mai: ex keut pot jun pot ka sonsang pon tix laig, daux meung raoma, ka daux bawg yam pa ang ot rheung heue.

Ka daux singaix, lox sikah kawn pwi pieang haktiex, koe 6170 ceu heue. Hoik tiem phuk lai sigangsi ka lox 1978 ceu heue. Pa tiem grum naog khawm uik, mawh plak lox 700 ceu heue. Phuk lai sigangsi pa khraox, hoik thut lih plak lox pwi 1000 ceu heue. Pwi pieang haktiex ka daux 100 kaux, 97 kaux, hoik pon tix phat lai sigangsi ka plak lox to kaux tix heue. Ka daux tix



Siyiex tawx phuk lai sigangsi, sonsang tang kawn pwi ka krax taoh Yesux pa chix tawx pa rieang ka pwi heue. Mawh pa tiem ka Khwan Cao mai: kieh ex tawng ka ceu pa mawh pa mawh pa meh heue. Vienag pa ang mhawm khankix kawx, jhi ka ex kieh tawng heue. Khaix an thong ex hu ka daux krax pa khaw pa caw heue. (2 Temse: 3:16-17)

num, pon tix plih phuk lai sigangsi lheu khaing 100 lag heue. Phuk lai pieang haktiex, ka daux 100 phuk 10 phuk ang koe pa pon rwadroi hu heue.

Phuk lai sigangsi kied koe pa ting sibrawm, tix kheem ka khawm uik heue. Kheu mawh pa tiem tix deuh grawng Yesux Khrit heue.

Mawh pwi mawx? pa lheu ting bwan son khaing pa tawng ka gumlox phuk lai sigangsi Siyiex, mai: pa yum rhawm ka gumlox an lie?



BAUX 1


SIYIEX PA MAWH TETE, PA KOE TIX KAUX KHAING:

Maong tix jhak ka raoma, Mawh mawx pa phan pa yuh simuing khankix lie? Ang maix tawng mawh pa phan pa yuh Siyiex lie? Simieag Siyiex mawh pa kaux cong, mai: pwi tix kaux kawx, ang chix uik tawng pa yuh Nawh heue. Aux mawh Siyiex leeing ju, cao pa phan ka maix, mai: pa yuh pak peung maix, tom kawn ot maix daux vaig miex maix heue. Mawh ngie Aux khaing pa yuh raoma mai: haktiex mai: pa phan tix deuh kawn pwi, pieang haktiex heue. Aux mawh Siyiex, siyiex tang kaux ang koe heue. Aux phan pa rieang mai; pa faik, mai: kieh koe pa haok huan mai: pa kha rhawm, simieang Siyiex ah nan heue. Mawh ceu pa tix, pa sang chix tieag mai: Siyiex lie? Mawh sang pon yuh maix pa awm cie Nawh lie?

Siyiex ah nin, raoma mawh Dangngeung Aux heue. Haktiex mawh dee deuh Aux caong tix heue. Maix sang pon sum dee ot ka son Aux yuh ka mawx? Dee ot Aux mawh dee mawx? Jhak heue. Taix Aux hoik phan hoik yuh ceu in khankix ang mawh lie? Siyiex ah nan heue.

Cao pa phan haktiex mai: raoma pa mawh Siyiex cao pa giex kaing: pieang ku ceu khawm uik, nawh ang ot ka daux nyiex bwan pa yuh ka taix heue. Nawh ang mawh Siyiex pa lo ka pa tawx kawn pwi, mawh Siyiex pa tawx khwan ju pa im, mai: pa kieh kawn pwi toek bhawm tix heue.

Mawh khu nan, pwi tix kaux kaux, nieb ah tix yuh krub Siyiex, ka khri, ka mau, ka simaox, ka khaox khankix, ang lai chix khaw caw tix bawg kawx heue.



Siyiex phan ka rawm, ka gawng lwa, mai: ka khaox ox rib riem, mai: can tosatsat ku ceu, mai: goihk tix phan ka kawn pwi heue.

SIYIEX PA KAUX PA KOE LEEING JU

Sivoe ang haktiex raoma nyang ba koe, Siyiex hoik dawg koe tom yam jah dix dix heue. Siyiex hoik dawg koe tom dix, mai: yam in, mai: leeing ju leeing phan heue. Siyiex phan ka haktiex, raoma, mai: singaix, khix, simuing, khaox ox rib riem, khawm tosatsat to mieang: ku ceu heue. Dee goihk khaix, Siyiex phan ka kawn pwi simex mai: sibon, sonsang yuh paox pie tau mai: Nawh cao heue. Siyiex ah nin ka kawn pwi, kieh pex pre, kieh pex pex, mai: kwang ka pieang ku ceu, mai: nawb bwan son ka kawn pwi heue. Siyiex jah tix phan yuh simex mai: sibon, mai: kieh mawh pa giex kaing: pieang haktiex khawm uik heue. Kieh pwi tang: ah lox tix, ceu mawx ceu an, mai: goih dee ot ka son kawn pwi heue.

GRAWNG TUK TIEAK KAWN PWI KA SIYIEX

Kawn pwi tuk tieak ka Siyiex cao pa phan pa yuh heue. Ang cu ang ngied lox Siyiex. Ang hawt yuh lox tawm: ping nyap Siyiex hoik lud hu ka dauks krax pa ang mawh ang meh heue. Tang moh kix ka Siyiex, kix moh ka rieang rao pa yuh kix ka taix tix heue.

Kix kieh lih koe krax song rhawm: song rhi Siyiex heue. Kix mawh paox koeng ka Siyiex, mai: koeng ka Siyiex cao phan cao yuh tix.

Yam haoh hun: kawn pwi ka pieang haktiex, phimap nie lheu koe pieang haktiex, mai: ceu pa suing pa brai, nied tix koe tom nie, Siyiex kied laux rhawm, mai: kied saux dauks rhawm rhi Nawh heue.

Yam in, Siyiex ot pieang meung raoma, mai: jhak ka pieang haktiex mai: yax ka kawn pwi heue. Kawn pwi pa tawng ka pa mawh pa meh, mai: doh keut ka phimap tix, mai: deeh hoek ka Siyiex, koe ang koe Siyiex jhak ka heue. Vieang mawh nan, kawn pwi hoik hu dauks pa lud pa loe khawm uik heue. Pwi pa yuh krax pa khaw rhawm Siyiex, ang koe tix kaux kawx heue. Pon ang doh koe tix kaux kawx heue.

Vieang kawn pwi tawng grawng pa rug koe Siyiex tete, kawn pwi ang koe krax lhat graung yungyi ka Siyiex heue. Krax keut krax sawn kawn pwi, lih koe pa hun pa hai, mai: mawh: pa faik heue.

Vieang kawn pwi keut to kaux tix mawh pa chix pa tawng kawx, kheu kix ang tawng ka Siyiex, kix hoik loh tix cie: sibrawm pa tawx Siyiex, ka tosatsat kix pa mawh sim, kax, mai: pa chix chux chix mo heue.


GRWNG PA AP SIYIEX KAWN PWI KA DAUX ALO NEX NHAM

Mawh kheu nan, Siyiex ap kawm pwi ka daux pa hawt yuh alo nex nham, pa mawh pa phit pa vao, pa suing pa brai: to kaux ku ceu heue. Kix hoik loh tix cie ka pa pie pa lhen, mai: pa ang rah ang see, ka pa mawh pa meh cie Siyiex heue. Kix hoik hu daux krax pa lud pa loe, kheu ang kix krub ka Siyiex cao pa phan pa yuh, mai: krub ka Siyiex pa yuh ka taix, pa mawh pa giex pa going heue.


Kawn pwi, koeng ka Siyiex mai: ang rhawm doh keut ka Siyiex, mawh kheu nan, rhawm rhi kix tom hawt yuh ceu pa ang khaw ang caw, pa bo rhawm bo rhi, pa plaux ju pwi yum, pa suksak makmee pa sa pa lao grawng pwi, pa jhax pa lawng, pa ang cu ang ngiet lox miex keeing, pa ang kaux sijax, pa ang koe krax caox rhawm, pa koeng pa khi:, mai: kaing ceu pa ang khaw mai: alo Siyiex ku ceu heue. Can pwi pa yuh ceu pa suing pa brai: khankix khawm uik tak yum, mai: khaix hoik yum kix, tak sang hoek daux krax prawng krax ciyang heue. Vieang kawm pwi tawng grawng pa sang yuh Siyiex ceu an khankix kawx, kawm pwi nied tix yuh pa ang khaw ang caw ka plak sivoie ngai: Siyiex heue.

KRAX PRAWNG KRAX CIYANG PA YAOX TIX KHAM KHAIX HOIK YUM

Siyiex ah nin, can pwi pa im ju pieang haktiex khankix, tak yaox krax tuk krax kha heue. Aux tak sang prawng ciyang ka kawm pwi awm pa yuh nawh, mai: tak sang pawk tix tawx ka pex awm pa yuh pex, pa suing pa brai: heue. Aux ang caox rhawn



Kawn pwi haktiex, bo rhawm bo rhi tei ju paox tix yum, tuk tieak tu te, pie lhen ka paox tix, pa ang koe satix, pa ang kaux Siyiex, mai: pa ang koe krax cao rhawm ka paox tix heue.



Mawh khu sang yax tix kham geu krax prawng krax ciyang, khaix hoik yum tix.

ka pex, mai: ang lai kieh pex luan: khaing ceu an khankix heue. Pwi pa ang koe rhawm kien: pa ting rhawm, pwi pa pauh pwi yum, pa phit pa vao, pa krub rieang krub rao, mai: can pwi pa pie pa lhen khankix, tak taing nawh laig ka dauh ngu mhat heue.

Siyiex tawx satix ka kawn pwi, khu hoik tuktieak kawn pwi ka Nawh, kawn pwi tak hoek krax yum, mai: khaix yum, tak sang laig dauh mhawnarhok dee kham: leeing ju heue. Kawn pwi sang chix phan yuh pa tix? Kawn pwi lih mawh siliex phimap. leeing: ju mai: pa lhat ka krax yum heue. **Mawh khu sang yax tix kham geu krax prawng krax ciyang, khaix hoik hoek kix krax yum heue.**

SIYIEX KWN BAOX MOH KA KAWN PWI

Siyiex ah nin, Aux hoik jawg tix priex ka kawn tix laoh laoh lie lie, mai: kix ang ngied lox Aux, mai: kawn tuktieak tute ka Aux heue. Kawn mawie mai: to sat khankix, kawn tawng ka cao pa priex tix, vieang mawh kawx nan, pwi pa hoik phan hoik yuh Aux khankix, hoik pi awm ka Aux heue. Vieang Aux yuh ka mawx ka son kix kawx, kix ang deuh koe ceu ka pa yuh Aux heue.


'O' kawn pwi dak sidaing riex ding dawd lie? Kix hoik lih keh dauh phimap mai: hoik prah hoik ghram ka Siyiex, mai: hoik singai hu khaing Aux heue.

Kawn praix pa moh khankix, ngied ka lox Aux, keut dauh rhawm pex heue. Pa rah pa see cie Aux mawh pa rieang kawn pwi heue.

Aux mawh Siyiex cao pa phan pa yuh ka pex heue. Yuh ka mawx pex chix lhat ka pa chix yum awm rib riem tix vud khaing, pe ang lhat ka cao pa phan pa yuh khix, simuing, mai: chix lhat ka kawn pwi pa chix yum lie?

Siyiex baux ah nin, ngied heue. vieang pex naog mai: phimap phigraum mie ding kawx, vieang suing brai: mie ding kawx, Aux tak sang kieh pex paing awm rawm rhax heue. Vieang phimap pex kied raoh kawx, tak sang kieh paing awm hauk yung heue. Phan pex rawg ka Aux, ka krax teem krax coi, pex tak sang pon krax gaux rhawm gauxrhi, mai: ceu pa fah rhawm ku ceu heue. Aux hoik pluot ploi phimap pex khawm uik, mai: ang lai doh keut ka heue.

Vieang nawh hoik
phan hoik yuh ka haktiex,
pwi hak tiex ang een ang
sawn nawh koe ceu.



BAUX 2

KAWN SIYIEX YESUX KHRIT

Yam jah koe gum lox heue. Nawh hoik dawg ot mai: Siyiex heue. Gum lox an mawh Cao Yesux Khrit heue. Nawh mawh Cao phan ku ceu heue. Pa ang Nawh phan, ang koe tix ceu kawx heue. Ka daux Nawh koe ju, ju an mawh pa rieang kawn pwi heue. Pa rieang an, jhan rieang daux pa faik, mai: pa faik ang chix pex ka Nawh heue.

Gum lox an, hoek ka pieang haktiex in heue. Vieang Nawh mawh cao pa phan yuh haktiex kawx, kawn pwi haktiex ang tawng ka Nawh, Nawh mawh kawn pwi mai: hoek ot tau mai: kawn pwi tix vud heue. Vieang Nawh hoek ka daux halktiex, haktiex ang rieb tix teei ka Nawh heue. Can pwi pa rieb ka Nawh mai: pa yum rhawm ka Nawh khawm uik, tak sang tawx akhwang pa mawh kawn Siyiex ka nawh heue. Can pa lih mawh kawn Siyiex, ang lai mawh khu a lo nex nham kawn pwi, ang lai mawh khu a lo rhawn rhi kawn pwi, mawh pa kieh Siyiex kix keh heue.

Grawh grawng in, mawh grawng lox gaux rhawm pa daox pa am pa yuh Siyiex, ka daux pa ploi Nawh kawn tix Yesux Khrit heue.

SIMIEANG MEUNG SIYIEX, CAO KHRIT

Num pa hoik luan been 3000 num dix, Siyiex ah nim ka cao jhai (Pwi pa dha krai grawng pa sang lih mawh) jhak heue. Simieang pa ting pieang khawn uik hoik hoek heue.

Nawh awm pa rieang singaix pa ang koe vui pai awm pa tie, pa jhan rieang plak pon ngawb heue. Nawh hoek tix tik vud ka naing sivai pieang haktiex, mai: viex pa nhim pa yienyawg hoek heue.

Siawp sibrawm Nawh, vieh khaing rawm: sigrit sigra:, mai: hoek tom sidah haktiex heue. Pwi koeng ka Nawh ang chix pon tieh ka Nawh, mai: pwi hun pwi hai kawx, ang chix pex ka Nawh heue.

Simieang (lox in plak lox Heabrie ah ka Mesiyax heue) sang ah ka simieang pa sang giex kaing pieang hak tiex ka dauw Siyiex heue. Pa koe dauw phuk lai sigangsi tix blah (Plak lox Helasax) tiem: cao taoh, phan ang mawh nan, cao pa mawh simieang heue. Ka dauw phuk lai in, tiem tix deuh Cao Khrit, phan ang mawh nan, Simeang heue.

**Nawh manh pa rieang krax hu khawm uik, mai;
Cao pa kieh pwi hoek ka Aux heue.**



Aux tak kieh nawh mawh simeang pa ting rieang, ka pieang haktiex in heue. Pa giex Nawh kaing:, ang lai chix uik awm baux khix singaix heue. Aux tawx sibrawn ka Nawh pa sang giex kaing: ka can pwi pieang haktiex khawm uik heue. Siawp sibrawm Nawh, ang chix sidah, mai: ang chix laux tix bawg kawx heue.

Nawh hoek tix jhi kawn pwi yaow dauw krax pa khaw pa caw, mai: kieh pwi pa laux rhawm khankix kaux cong rhawm rhi, mai: ploi lox grawng sang ciyang pwi pa ang rah ang see, khuu pa yuh nawh pa ang khaw ang caw heue.

Nawh phan Nawh yuh can ceu pa koe ka pieang haktiex khawm uik, mai: simieang Siyiex pa tawx bhawm pa im ju ka can to sat khankix, pa mawh cao taoh Yesux Khrit, hoik krai tix deuh yuh nan heue. Jhak heue. Aux tak sang jhi pex yaow mhai pa daow pa am tix ceu heue. Bon krix tix kaux, tak sang koe kaux, mai: nawh tak keh kawn simex tix kaux heue. Tak sang kok ceu kaux nawh mawh Emanoelax (dee bleeh, mawh Siyiex pa ot tau mai: ex heue.) Nawh tak sang mawh dauw krax ju son kawn pwi, mai: tawx pa rieang ka kawn pwi, mai: viex pwi hoek ka Aux heue.

Siawp sibrawm pa kwang ka haktiex, koe ka dauw taix Nawh, ceu kaux Nawh, mawh pa daow am, paowpie pa chawh cheng, Siyiex pa ting sibrawm, keeing leeing ju, Cao pa nhim pa mhawm ah nan heue.

Meung cao pa naog mai: pa nhim, kied sidaing viex, mai: ang koe dee sidah heue. Nawh tak sang giex kaing: ka dauw pa khaw pa caw, mai: sang viex hoek ceu pa nhim pa gaux rhawm, mai: pa rah pa see, son pwi pieang haktiex khawm uik heue. Awm pa hoik naog rawm ka dauw rawm: sigrit sigra: khawm uik, pingnya pa tawng ka Siyiex, tak sang naog ka pieang haktiex in heue.

GRAWNG HOEK YESUX PIEANG HAKTIEH

Tix bawg dix, Siyiex ploi kawn cau raoma hoek ka bon krix Ma Rhix, pa ot ka veng tix mu, pa koe ka daux meung Isarilax heue. Bon krix pa kaux Ma Rhix an, hoik yuh sinax nawh mai: Yo Siep heue.

Ma Rhix lhat graung ka lox pa krai kawn cau raona, mai; keut rhawm rhi tix ka lox an heue.

Kawn cau raoma baox ah nin, paw lhat paw graung, awm pa hoik krai Siyiex ka cao jhai khankix, maix tak keh kawn simex tix kaux heue. Kawn simex an, mawh pa ting pa lhaong heue. Nawh mawh cao pa taoh kawn pwi haktiex khaing daux phimap, mawh khu nan, tak sang kok ceu kaux Nawh mawh Yesux (Dee bleeh, CaoTaoh) heue. Yam ting kawn nyawm an, Nawh tak sang mawh simieang pa giex kaing pieang khawm uik, mai: meung Nawh ang koe dee sidah, mai: Nawh ang koe dee sidah, mai: Nawh tak giex kaing ku ju leeing ju leeing phan heue.

Ma Rhix ah nin, ka kawn cau Siyiex, in chix lih mawh yuh ka mawx? Aux mawh bon krix, mai: ang sa dex dawd mai: simex. Yam an kawn cau Siyiex baox ah nin, siawp sibrawm khwan Cao tak sang lih hoek ka pieang maix heue. Mawh khu nan, kawn nyawm pa keh an, tak sang kok ceu kaux nawh mawh kawn Siyiex khu pa ang Siyiex chix yuh, ang koe tix ceu kawx heue.

Yam mhong Yo Siep grawng: pa koe kaux Ma Rhix, khu mawh Yosiep pwi pa mhawm tix kaux, nawh tom keut sang goih khaing nawh heue.

Kheu ang nawh sang kieh Ma Rhrix kaig twa, nawh tom keut tix sang goih khaing Ma Rhrix heue.

Yam keut Yo Siep ka grawng in, nawh laig it, mai: kawn cau Siyiex hoek ka nawh daux camaox heue.



Kawn nyawm: pa keh an, tak kok mawh kawn Siyiex heue.

Kawn cau raoma ah nin, Yo Siep, paw lhat tix tee moeng maix Ma Rhrix, kaux pa koe nawh, mawh kawn pa tawx Siyiex heue. Siyiex ah nin, bon krix tix kaux, keh kawn simex tix kaux, mai: nawh tak mawh daux krax pa rieang son pwi khawmuik khawm leeing, mai: mawh Cao pa viex kawn pwi hoek ka Aux heue. Yam siduad Yo Siep khaing dee it tix, nawh hawt yuh awm lox pa krai kawn cau raoma ka nawh, mai: nawh tee tix priex ka Ma Rhrix, mai: viex nawh hu heue. vieang mawh kawx nan, Ma Rhrix kawn ca ot singax singeh awm mawh nawh bon krix, tom sidah keh kawn ngie, pa mawh Yesux Khrit heue.

Awm pa koe lox sijax mukheu, nawh tom keh kawn simex heue. Ma Rhrix keh kawn ai tix kawx, mai: pua: nawh ka man ka leem, mai: kieh nawh it daux dawng: sawm: mawie heue. Yo Siep, sum ceu kaux kawn ngie an, mawh Yesux heue.



Kawn ngie pa keh khaing Ma Rhrix mawh kawn pa ploi Siyiex hoek heue.

BAUX 3

GUMLOX PA DAOX AM, KAING PA TING SIBRAWM

Yam koe ju Yesux 30 num, nawh lih hu ka daux Isarilax, plak jee, mai: Sidiex gumlox bwan gaux rhawm gaux rhi heue. Nawh Sidiex grawng can pwi pa yum rhawm ka Nawh khankix, tak hoek ka daux meung Siyiex, pa hoik cox ti deuh heue.

Yesux ah nin, doh keut ka phi map tix khawm uik, mai: yum rhawm ka gum loxbwan: heue. Meung Siyiex pa khraox, hoik dex sang hoek heue. Yam an pwi pa kham geu jhawm saux, hoek ka Yesux tom nie heue. Yesux kieh kix khawm uik grai jhawm saux heue.

Daux bawg yam pa ang ot rheung, siawp sibrawm pa dao am, pa yuh Yesux, tah ka daux haktiex Galilie, tom sidah hoek ka daux haktiex. Siriya ku dah ku dee heue. Can pwi pa kham jhawm saux ku ceu, can pwi pa laig phi khankix, can pwi saux laung: khankix mai: pa koe jhawm saux bhaung; khankix, pa dug ngai, mai: pa laux taix laux caong khankix, mai: pwi dug ngai khankix, kix hoek ka Yesux heue. Yesux kawx, kieh jhawm saux kix moi khawm uik heue.

Veng pa koe sivoie meung Galilie (10) veng, meung Yudax toi rawm: Yaw dan, can pwi pa koe daux baoh haktiex an tom nie, kix hawt hu khaix Yesux ku dah ku dee heue.

Daux tix singaix, Yesux hu ka rawm nhawng Galilie heue. Pwi haoh pwi hun, pwi hu hawt hu khaix Yesux heue. Kheu kied haoh hun pwi, son ang sang krox tix, Nawh cao mhaing ti brug reu heue. Kheu Yesux pai pwi koe jhawm saux, mai: kieh moi tom nie, pwi saux khankix sawg tix tawx to kaux sonsang pon teeh ka Yesux heue.

KIX DAK LHAT DING DAUD YUH KA MAWX ?


Khaix hoik ghram ka cud pwi haoh pwi hun tan, kawn cau khankix vai: reu greung rawm heue. Yam an bhaung ting lih mai: rawm pukpak mai: rawm laig tom daux reu mai: reu dex sang blawn heue. Vieang mawh nan, Yesux laig it plak sidax reu heue. Kheu kied lhat kix, kix so: Yesux mai:ah nin, simieang, eue, ex hoilk dex sang glup heue. Taoh ka ex lieak.

Yesux kaoh khaing dee it tix, mai: ah ka bhaung, mai: bhaung yien yawg tix, ka daux bawg yam tix vud khaing heue.

Yesux ah nin, ka kawn cau nawh khankix, pex chix lhat graung ding dawd yuh ka mawx? Pex ang nyang yum rhawm ka Aux lie? Cub kawn cau khankix, daox deng ka Yesux, mai: jhak ngai paox tix tix kaux lai tix kaux mai:ah nin ka paox tix toi rawm sigrit sigra, mai: hoek daux nhawng Gene tiriet heue. Yam lih Yesux khaing reu, mai: hoek pieang tiex, pwi haoh pwi hun yaox ka nawh, mai:baox krai grawng hoek Yesux ka paox tix, ku dah ku dee heue.

Dee hoek Yesux daux veng daux yaong khankix, pwi pa klawm pwi saux, hoek ka Yesux heue. Pwi haoh pwi hun,ot dex krax mai: daux lah mai: deuh pwi saux sonsang teeh ka Yesux heue. Mawh kheu can pwi pa teeh pie ka kraung ceep Yesux khaing: hoik moi jhawm saux dom mawx dom an heue.

Yam yao Yesux ka can pwi haoh pwi hun, pa pau tix teeh ka Nawh khankix, Nawh kied koe krax caox rhawm caox rhi ka kix heue. Grawh grawmg nawh kheu kix awm yung pa ang koe cao lieang, mai: Yesux jah sidiex ka kix ka gum lox Siyiex heue.



Pwi ceu in kix, mawh pwi pa yuh ka mawx?

Vieang rawm mai: bhaung, hoik ngied ka lox nawh heue.

PWI KOE BWAN SON MAI: PWI PA MOH

Yam jah Yesux tix sidiex lox bwan Nawh Sidiex ah nin, pwi hot daux khwan khankix, koe bwan son heue. Kheu meung raoma mawh cie kix, pwi pa khi rhawm khi rhi khankix koe bwan son heue. Kheu kix tak pon pa nyawm rhawm nyawm rhi, pwi pa awn; rhawm awn: rhi khankix koe bwan son heue. Kheu kix tak pon haktiex;

Pwi pa cai rhawm cairhi son pa rah pa see khankix koe bwan son heue. Kheu kix tak sak.

Pwi pa chix caox rhawm caox rhi khankix koe bwan son heue. Kheu kix tak pon pa caox rhawm caox rhi. Pwi pa singax singex daux rhawm daux rhi khankix, koe bwan son heue. Kheu kix tak yaox Siyiex. Yam pwi yuh pa ang khaw ang jiet ka pex, mai: tuk tieak tute ka pex, mai: ah pa caox pa ang mawh ang meh ku ceu grawng pex kheu Aux, pex koe bwan son heue. Kieh kied gaux rhawm gaux rhi heue. Kheu bwan son kied ting son pex ka daux meung raoma, kheu hoik tuktieak tute kix yuh nan, ka cao jhai khankix pa koe glang ka pex.

Vieang mawh nan, pwi pa moh ka haktiex, kied koe krax caox rhawm ka kix heue. Grawh grawng nawh, pa gaux rhawm kix, hoik uik ding khaing heue. Pwi pa gaux rhawm mai: kraung haktiex in, mawh krax pa kha: ka son kix heue. Grawh grawng nawh, ang lai rheung, kix tak yaox tix kham geu pa yiem rieag yiem yo heue. yam in, pwi pa yuh grang tix, mai: yuh pa lud pa loe khankix, koe pa ang nyawm rhawm ka son kix heue. Grawng kix, mai: yam yaox kix krax tok krax kha, hoik kied dawd tete heue. Can pwi pa silao daux pa yuh min yuh sire haktiex in, koe pa kha: rhawm ka son kix heue. Grawh grawng nawh, pieang haktiex in, mawh dee pon pa yaog min sire son kawn pwi heue.

KHRAWM: KRAUNG PEX SON MEUNG RAOMA

Paw deuh kraung pex pieang haktiex dee pungpieang siah, mai: rhaw chix yuh laux mai: dee pwi briex ehix yieh tix laig mai: briex heue. Khrawm: kraung son pex ka daux meung raoma, dee ang pung pieang siah mai: rhaw: chix yuh laux, mai: dee ang pwi briex chix yieh tix laig mai: briex heue. kheu dee koe kraung pex dee mawx ang ah, rhawm pex kawx, koe tan: heue.


PWI PA HOEK DAUX MEUNG RAO MA, KIED TUX HEUE

Pwi tix kaux kawx, ang sa pon yuh siliex son simieang ra kaux, awm an son kraung khrai mai: son Siyiex heue.

Pwi khirhawm son pa ih pa un. Ju kawn pwi lheu ngawh khaing pa ih pa un heue. To kaux kawn pwi lheu ngawh khaing: kraung ceep ang mawh lie? Siyiex pieang raoma hoik tawng pex lo can ceu an khankix khawm uik heue. Mawh kheu nan, kieh pex sawg Siyiex mai: pa rah pa see Nawh phao ka ha:, mawh pa ting ceu daux ju maix heue. Phan yuh nan, Siyiex tak baow tawx ceu pa lo ku ceu khawm uik ka son ex heue.

Rien rhawm ka pa hawt yuh alo nexnham mai: pa ghoing ka ceu pa koe pienag haktiex heue. Krax gaux rhawm pa rug tete telai, ang chix pon daux kraung khrai haktiex heue. Ceu pa chix tawx haktiex ka kawn pwi mawh kraung khrai mau khri, mai: pa chix yaox ka ngai, mai: pa gaux rhawm daux pa mhawm grang:haktiex tix vud khaing heue.

Can ceu pa koe pieang haktiex in, mawh pa vai tix vud khaing. Vieang mawh kawx nan, can pwi pa sawg meung Siyiex mai: pa yum rhawm ka gumlox Siyiex, tak pon ju leeing ju leeing phan: heue.



Aux mawh siviex meung raoma heue.
Pwi pa yum rhawm ka Aux, tak pon ju leeing ju heue.

Siviex meung raoma mawh pa ieak pa sikhawp, siviex mhawnarhok mawh pa vieh pa ting, mai: yie tix laig, pwi tom nie hu daux krax an heue. Vieang mawh nan, siviex mai: krax hu meung raoma mawh khu sikhawp, can pwi pa yax kied tux heue.

RIEN RHAWM KA PWI PA PRANG TIX MAWH KHRIT YAN

Rien rhawm ka pa hoek ka pex, pa ah nin, aux mawh sara ting, aux mawh cao sidiex pa ting, pa ah nan heue. Vieang kix yuh pakpeung tix mhawm grang, mai: vieang kix nyaw glaw ka lox mhawm kawx, rhawm rhi kix simie tix ih, awm soxla pa caox heue. Son sang chix tawng ka kix, jhak ka plix kix pa mawh kaing pa yuh kix tix ceu hoik tix ceu heue. Grawh grawng nawh, pang kat ang chix plix plix shiet, mai: khaox kat ang chix plix plix ruh heue. Kheu nan, chix tawng kix ka plix kix heue.

Yam sidah uik bawg yam sax, pwi khawm uik, tak kaoh im khaing: daux simuig heue. Pwi pa rah pa see Siyiex khawm uik, tak sang im ju daux meung Siyiex heue. Pwi pa im ju daux phimap phighram, kix tak kaoh im khaing: krax yum, mai: tak hoek krax prawng krax ciyang heue. Jawg tix ngied heue. Can pwi ot daux simuig ku kaux tak sang kaoh im yam mhong kix lox kok Aux, kaux pwi mawx kaux pwi an, tak sang kham geu awm pa hoik yuh tix heue.

Aux mawh siviex meung raoma heue. Pwi pa yum rhawm ka aux, tak sang pon ju leeing ju heue. Aux krai lox tete telai ka pex, Siyiex kied moh ka kawn pwi haktiex khawm uik, mawh khu nan, Nawh tom tawx kawn Tix hoek pieang haktiex heue.

Grawng: pa plo Siyiex kawn: Tix hoek, mawh sonsang pon

can pwi pa yum rhawm ka Nawh ku kawx, krax taoh ju daux meung raoma leeing ju leeing phan heue. Yum rhawm ka gumlox pa krai Aux ka pex heue. Aux krai lox sidawng lhaing lhaing ka pex, can pwi pa yum rhawm ka cao pa ploi Aux hoek, tak sang pon ju leeing ju mai: ang yaox tix kham geu kheu phimap pa yuh tix heue.

Kix tak lawd luan khaing krax yum mai: pon pa im ju leeing ju heue. Mawh kheu Yesux Sidiex gau yuh nan, pwi haoh pwi hun, kied koe krax dao deng ka heue.

Grawh grawng nawh, kheu lox Sidiex Nawh ang lai awm lox Sidiex pwi koe pingnya nong nong, hoik awm lox krai pwi ting sibrawm tete heue.


Yesux Khrit, yie hu tix rawg bwan tau mai: kawn cau Tix, mai: laux lee Tix, tix dah dah bawg tix blah heue.

GRAWNG LHAT PHICAOX KA YESUX

Daux tix singaix, pwi tix kaux hoek ka Yesux ah nin, Yesux caox rhawm ka kawn simex aux lieak, mawh kheu laig phi ka daux nawh mai: yaox tix kham geu jhawm saux tom nie heue. Nawh rau daux ngu daux rawm tix vud tix vud heue.


Yesux ah nin, o pwi pa hun pa hai pa ang koe krax yum rhawm khankix, mawh kawn sang ot Aux mai: pex mie ghreung lie? Nawh nhie kix viex kawn nyawm hoek mai: haoh phi pa suing ghreu lih khaing nawh, mai: phi pa suing an lih khaing kawn nyawm an, mai: nawh nyawm ot awm phao ka heue. Can pwi pa cung tix jhak kukaux daux pwi, sidaing dao am ka ceu pa yuh Yesux heue.

Ka daux singaix an, sivoie ang singaix nyang klip, kix viex pwi koe jhawm: saux ku ceu hoek ka Yesux heue.



Yesux deuh taix pieang kaing: pwi saux mai: kieh kix moi jhawm saux uik heue.

Nawh cao deuh taix pieang kaing: pwi saux khankix, mai: kieh kix moi: jhawm saux heue. Pwi laig phi khankix, goh sivoie ngai Yesux heue. pwi laig phi ah nin, Yesux kawn Siyiex eue,



Kawn sibon kaoh mai: lawng krax dauh nyiex heue.

kheu tawng phicaox ka grawng Yesux, mai: Yesux baox sidiex ka phicaox, kieh kix yienyawg tix son ang phi pa suing pa brai an khankix baox yo lox tix heue.

YESUX KIEH KAWN BON PA HOIK YUM DEEH KAOK IM

Yam hoek cub pwi haoh pwi hun ka Yesux, kix rop vung vieang Nawh, yam an, cao giex kaing: been li yudax, pa ceu kaux nawh mawh Yaerux, greed hoek ka Yesux, mai: grux ngawng mai: ah nin, kheu kawn bon aux hoik dex sang yum, yuh bwan son hoek deeh taix Maix ka pieang nawh, sonsang moi nyawm ot nawh lieak.

Yam hu Yesux ka nyiex Yaerux, pwi hun hawt khaix nawh, tom hoik dig pieang paox tix heue. Yam kawn hu kix, pwi tix blah hoek khaing nyiex Yaerux, kawn bon Yaerux hoik yum, paw lai lak lheet ka Yesux heue. Vieang mawh nan, Yesux ah nin ka Yaerux, paw lhat, yum rhawm ka aux heue.

Yesux kieh pwi haoh pwi hun ot tan, mai: viex kawn cau nawh hu loe kaux heue. Yam hoek kix dauh nyiex, pwi sinun dauh nyiex heue. Pwi pa yiem kawx yiem heue. Yesux laig dauh nyiex mai: ah nin, pex sinum yiem rieak yiem yo yuh tix? Kawn bon in ang yum, mawh laig it nawh heue.

Mawh kheu hoik tawng kix grawng hoik yum bon an, kix deeh nak nawng: ka Yesux heue. Vieang mawh nan, Yesux nhie kix lih khaing nyiex khawm ujk, mai: kok miex keeing kawn nyawm hu dauh lawg dee koe kawn bon an heue. Yesux giex taix kawn bon mai: ah nin, kaoh heue. Kawn bon an kaoh dom mawx dom an, mai: hu dauh lawg heue. Kawn nyawm bon an koe ju 12 num heue. Yesux ah nin ka can kix pa yaox ceu pa dao pa am pa yuh

Nawh khankix, paw vi krai grawng in ka pwi tang kaux heue.
Nawh cao kieh kix tawx kawn nyawm an ih priex heue.


Yesux ah nin ka cub pwi haoh pwi hun heue. Ngied ka lox pa krai Aux mhawm mhawm awx. To kaux Aux, Aux mawh pa kaoh im mai: mawh ju heue. Mawh khu nan, can pwi pa yum rhawm ka Aux, vieang yum kawx, tak deeh kaoh im heue.

Aux krai lox pa kaux sijax ka pex heue. Can pwi pa ngied lox Aux mai: pwi pa yum rhawm ku kaux, kix hoik pon ju leeing ju mai: ang lai hoek daux mhawnarhok heue. Nawh hoik luan khaing krax yum mai: pon pa im heue. Paw yuh tix dao deng ka grawng ceu in heue. Yam pwi ot daux simuig mhong lox Aux mai: deeh kaoh, hoik dex sang hoek heue. Can pwi pa yum rhawm ka Aux, nawh tak deeh kaoh daux pa im ju daux meung raoma heue. Can pwi pa yuh phimap kham geu krax prawng krax ciyang heue. Can pwi pa yum rhawm ka Aux, vieang yum kawx, tak sang im ju leeing ju heue.

Yam hoek bawg yam sidah haktiex, simieang Yesux ploi kawn cau raoma khankix, mai: ciyang ka kix awm ribriem pa gleeing ka ngu heue. Mawh khu nan, kix tak sang hoek dee greeik rhang, mai: dee yiem rieak yiem yo heue.


KIX TAK SANG TEEI NAWH YUM, VIEANG MAWH NAN, NAWH TAK DEEH IM KHAING KRAX YUM

Yam yax kix ka sibrawm Siyiex yuh nan, mawh khu koe ceu pa lhat pa graung tom nie, mai: kix dao deng ka pa yuh Nawh cao heue. Pwi hun khankix, krai grawng pa yuh Yesux tix kaux tix ceu heue. Vieang mawh nan, Yesux kok ka kawn cau Nawh kao kaux ra mai: ah nin, pex ngied ka lox pa krai Aux ka pex heue. Yam in ex sang hu daux veng Yerusalim heue.



Kix giex ka Aux, mai: nunai ka Aux mai: baik mya: ka pieang Aux heue. Khaix an, kix teei Aux yum heue. Vicang mawh nan, ka daux loe singaix Au deeh kaoh im heue. Pa ah Nawh nan kawn cau tix kaux kawx, ang tawng ka pa sang ah Nawh. Vieang mawh nan, kix ang pon chawk ka Nawh tix kaux kawx.

Yesux simieang eue, caox rhawm ka ex lieak.



PA RIEANG HAKTIEX

Yam kawn hu kix ka dauv veng Yeruxsaliem, Nawh cao hu sivoie pwi haoh pwi hun heue. Khaix hoik veh pha kix ka veng Yerikho, mai: Nawh cao yaox ka pwi dug ngai tix kaux, pa ceu kaux nawh mawh Batimie: ka praix veng tan heue.

Batimie: mhong grawng pa hu cub pwi haoh pwi hun dauv krax an, mai: chawh ka pwi grawng an, mai: kix krai grawng hoek Yesux heue. Batimie: kaoh dom mawx dom an, mai: kok yo ah nin, Yesux Simieang eue, caox rhawm ka aux lieak. Vieang pwi pa koe tan, briem ka nawh mai: ang kieh nawh kok yo lox tix kawx, Batimie: nied tix yo lox tix sinyek singek heue. Yam mhong Yesux lox an, Nawh cao cung tix dah, mai: nhie kix viex kaw an hoek ka Nawh heue.

Kawn cau Yesux, ah nin ka pwi dug ngai, Nawh cao kok ka maix, ah nin ka nawh heue. Nied maix hoek heue. Batimie: puik tix deuh man vhua: nawh, mai: nied tix hu ka Yesux heue.

Yesux ah nin ka nawh, maix simie tix kieh Aux yuh ka mawx ka maix, simieang eue, kieh ngai aux ehix yaox lieak. Kheu aux simie tix chix yaox heue. Yesux ah nin ka nawh, mawh kheu yum rhawm maix ka Aux, maix tak pon tix chix yaox heue mai: Batimie: blah ngai tix chix yaox dom mawx dom an heue. Batimie: hawt hu khaix Yesux tau mai: pwi haoh pwi hun heue.

Yesux ah nin ka pwi pa ot tan khankix, Aux mawh pa rieang haktiex heue. Can pwi pa hawt khaix Aux khankix, ang lai hoek ka dauv pa faik, tak sang pon krax im ju pa rieang heue. Aux krai lox tete telai ka pex, Aux hoek sonsang kieh pwi pa dug ngai khankix chix yaox, mai: Aux sang kieh pwi pa ce to kaux tix chix yaox khankix duk ngai: heue.

AKHWANG PA PON PLUAT PHIMAP

Daux tix singaix, kix klawm ka pwi laux caong tix kaux, viex hoek ka Yesux heue. Yesux yaox ka pa kied ting krax yum rhawm kix, nawh ah nin, paw vi ieak rhawm heue. Aux hoik pluut ploi phimap maix khawm uik heue.

Can cao giex kaing:li khankix mai: sara cao gau khankix, ah nin ka paox tix, kaw in ce tokaux tix mawh pa tix lie? Lheu khaing Siyiex, mawh pwi mawx pa chix koe akhwang pluut ploi phimap pwi lie? Mawh sang een sawn nawh to kaux tix mawh Siyiex lie? Kix ah nan ka paox tix heue.

Vieang mawh nan, Yesux tawng ka pa keut kix daux rhawm rhi tix heue. Yesux veeh tix plak kix mai: ah nin, pex chix keut ceu pa ang khaw ang caw daux rhawm rhi tix yuh ka mawx? Mawh Siyiex tix kaux khaing pa chix ah, Aux hoik pluut ploi phimap maix heue. Nawh baox ah kaoh mai: hu heue, Vieang mawh nan Aux tak jhi pex yaox sakse pa chix koe akhwang Aux tix pluut ploi phimap pwi heue. Nawh cao veeh ngai plak pwi laux caong an tix bawg mai: ah nin, mawh kheu hoik grai jhawm saux maix, teei kraung it mai: viex ing ka nyiex maix heue. Pwi saux an, teei kraung it dom mawx dom an, mai: yaogyaw bwan son Siyiex, mai: yaog tix hu sivoie can pwi pa hoek ka dee an khankix heue. Pwi khawm uik dao deng ka pa yuh simieang Yesux ka kaw an, mai: kix yaog yaw bwan son Siyiex, mai: ah nim ka paox tix tix kaux lai tix kaux, ex hoik pon yaox ka kaing pa ting pa lhaong pa tang pa siyox heue.


CAO GIEX KAING: KHANKIX, PA KOENG KA YESUX

Ka daux bawg yam loe num, Yesux mai: kawn cau Nawh khankix, khawm pwi meed pwi tawng Nawh khankix, hu tix lailing ka daux meung Isarilax ku dah ku dee, Nawh cao krai ka grawng: meung Siyiex pa sang hoek. mai: grawng: pa pluut ploi Siyiex phimap kawn pwi, mai: grawng: pa tawx Siyiex krax taoh ju mai: ju leeing ju leeing phan, ka kawn pwi haktiex heue.

Yesux pai pwi koe jhawm saux khankix kieh kix moi, ang joeng mawh nan, pie pa hoik yum kawx, kieh kix deeh kaoh im heue. Nawh sidiex gau grawng sidah haktiex, mai: grawng meung Siyiex pa tak sang hoek bawg phao khaix heue. Kix yum rhawm ka mawh Yesux cao taoh kawn Siyiex, mai: grawng pa mawh Yesux cao jhai Siyiex pa tawng grawng ku eeu heue.

Vieang mawh nan, can cub cao giex kaing: li pwi yudax khankix mai: pwi tiem lai khankix, kix kied koeng ka Yesux mai: kied lhat graung ka Nawh cao heue. Vieang kix tawng Yesux mawh kawn Siyiex kawx, kix ang koe rhawm tix sang rieb teei ka Yesux, mai: ang doh keut ka phimap pa yuh tix khankix heue. Pwi haoh pwi hun, hawt hu khaix Yesux ku dah ku dee, yam yaox kix kix nie koe krax boh rhawm ka Yesux heue.

Yesux ah nin ka can pwi pa hoek tix ngied lox sidiex gau Nawh khankix, rien rhawm ka lox sidiex cub pa giex kaing li khankix heue. Vieang mawh kawx nan, ngied ka lox pa krai kix pa mhawm, mai: paw hawt ka been pa yuh kix, kheu been kix ang khaw mai: lox pa krai kix heue. Been kix, mawh ngie yuh pa mhawm grang plak praix ngie heue. Kix ceep kraung ceep cao sidiex, yuh pakpeung tix laohlie sivoie ngai: pwi, son sang yaog



Kix hoik bleet ka krawng cie miex mai: khankix.
Yuh grang tix, mai: kraung ceep pa lang, rawg bwan son pwi heue.


yaw pwi ka kix mai: son sang mhawm ceu kaux kix sivoie pwi heue. Kix sawg min plak ngai kawm pwi, mai: teei dee ot ti dee mhawm dee ting khaing pwi heue.

Vieang mawh nan, kix ih kix bleet ka cie miex mai khankix, mai: ceep kraung ceep pa lang, yuh grang tix yam rawg bwan, son pwi heue. Pwi ceu an khankix, lheu yaox tix kham geu krax kham krax geu pa ting, khaing pwi pa ih pa yoek pa awp khankix heue. Vieang mawh nan, pex paw yuh awm kix, paw yuh grang: tix, yam rawg bwan heue. Phan yuh nan tom pon bwan son, pa ting pa mhawm khaing Siyiex heue.

Yam yuh pex ceu pa mhawm mai: krax tan krax lu, pex yuh son sang pon min plak ngai haktiex heue. Yuh pa mhawm pex dee glip heue. Phan yuh nan, Siyiex tak tawx bwan son ka pieang pex khawm uik heue.

GRAWNG PA KEUT CAO GIEX KAING LI KHAKIX TIX TEEI YESUX

Yam an, cao giex kaing: li khankix, kok ka cub cao giex kaing: li pa ting khankix, mai: kix ngawm kum ka daux nyiex haw simieang, kix krai; grawng pa yuh Yesux pa dao pa am, mai: preet ceu pa yuh Yesux ang chix yeet tix bawg kawx heue. Can lox krai ex, lih mawh pa ang koe ceu, kheu pa yuh kaw in, ex caw tix teei kaw in yum tete kix ah ka paox tix, mai: kix jah tix sawg daux krax pa sang pon teei Yesux yum heue. Vieang kix sawg daux krax sonsang teei Yesux yum kawx, kheu lhat kix ka pwi haoh pwi hun khankix, kix sidien ka grawng an heue. Kheu pwi haoh pwi hun hawt khaix Yesux, mai: kix lhat ka pwi hun, tom ang pon giex ka Nawh heue. Vieang mawh nan, kix baox ploi pwi jieang hu kieh sawg tix pon giex ka Yesux heue.



Maix mawh simieang
ka daux meung Siyiex heue.
Mawh maix kawn Siyiex lie?

BAUX 4

GRAWNG: PA GIEX KA YESUX

Bawg yam pon bo tix singaix, Yesux mai: kawn cau Nawh hu pieang gawng san lun, awm sa hu kix ku bawg heue. Yesux ah nin ka kawn cau Nawh khankix, pex ot tin ha, Aux hu tix rawg bwan tan ha, Daux rhawm Aux kied koe pa khirhawm tete heue. Pex ot tin mai: pex rawg bwan son Aux, Yesux ah nan ka kawn cau Nawh heue.

Yam hoik deeh hoek Yesux khaing dee rawg Nawh bwan, mai: kawn cau Nawh laig it sivoe Nawh cao heue. Yesux ah nin ka kix, kaoh pex phao. Naox it pex ha, bawg yam yaox Aux krax kharhawm kharhi hoik sang hoek heue. Jhak heue, pwi pa sang giex ka Aux hoik hoek heue. Nawh cao baox ah nin ka kawn cau Nawh, ex hu heue.

Kheu nan, Yesux ah nin ka pwi pa hoek tix giex ka Nawh, pa mawh cao giex kaing: li, kaing li na pex hoek tix giex ka Aux awm giex ka pwi briex, pwi con, mai: viex vaig viex khaox hoek ka Aux lie? Yam ot Aux tau mai: pex daux nyiex sidiex, pex ang yuh tittix ka Aux, Veang mawh nan, yam in mawh bawg yam pa faik mai: mhawm ka son pex heue. Can ceu in khankix, mawh sonsang grum naog alo Siyiex, pa ot pieang meung raoma heue.

Khaix an, kix giex ka Yesux, mai: viex Nawh cao hu daux nyiex dee prawng see, cao giex kaing: li heue. Can kruh naing pa pau ka Yesux, jah tix naknawn nunai ka nawh, ah lox map ka nawh, mai: tap toi ka nawh heue. Kix tawb ngai Yesux ka man, mai: Simang Yesux grawng mawh pwi mawx, pa simang Nawh. Kix ah lox map pa ang ceu ang cag ka Yesux ku ceu heue.

MAIX MAWH SIMIEANG, MAIX MAWH KAWN SIYIEX LIE?

Khaix an, kix viex Yesux hu ka cao giex kaing li pa ting heue. Ka dee an, cao giex kaing plak been li khankix hoik dha tix khrawm paox, sivoie Yesux tan heue. Kix sawg krax phit Yesux, sonsang yaox grawng teei Nawh yum heue. Vieang kix kham sakse pa ang mawh ang meh ku ceu grawng Yesux kawx, kix ang yaox dee phit nawh tix ceu kawx heue.

Cao giex kaing li khankix ah nin ka Yesux, Maix ang pawk ka lox pa khankix mhai sakse grawng maix lie? Yesux ang pawk ka lox kix tix gum kawx heue.

Cao giex kaing li pa ting ah nin ka Yesux, aux krai ka maix, aux tiex tu tix ka daux ceu kaux Siyiex pa singax singeh mai: chawka ka maix heue. Maix to rug mawh simieang meung Siyiex, mai: mawh kawn Siyiex tete lie? Aux ruk mawh tete heue. Lheu khaing an, Aux tak ngawm plak taix khawn dawm: Siyiex, mai: yuh simieang heue. Aux tak sang brug pai awm, mai: deeh hoek pieang haktiex in, mai: pex tak sang yaox ka Aux sidawng: heue.

Yam an, cao giex kaing li tix kaux, ah nin, kaw in nunai ka ceu kaux Siyiex heue. Ang lai lo tix sawg ka krax phit Nawh tang ceu can ex kawx hoik mhong lox krai Nawh ang mawh lie? kix yo lox sinum ah nan heue.


Kix khawm uik yo lox sinum ah nin, phimap krax phit in mawh pa keung tix teei yum tete telai heue. Caw tix teei Nawh yum, mai: caw tix yum tete heue.


Cao giex kaing: li pa ting kaoh cung khaing dee ngawm tix, mai: kieh kix tawx Yesux hu sivoie, dee ot cao bung cao kwang khankix heue.

Yam jah praix tix rieang pon ngawb cao cao, cao giex kaing: li mai: cub parishie, viex Yesux hu ka simieang Philat heue.

Yam hoek kix, ka simieang Philat kix ah nin, kaw in mawh pa kieh haktiex sungsang heue. Nawh mawh pwi pa tiebtie ka ceu pa tawx kheun, ka simieang giex kaing haktiex heue. Lheu khaing an, Nawh krai to kaux tix mawh simieang ting heue. Simieang Philat tawng grawng pa viex kix ka Yesux mai: krai grawng Nawh mawh pa lhak keut kix tix yuh, pa pie pa lhen, mai: nawh ah nin, pex krai grawng kaw in, mai: aux sawg ka phimap Nawh, ang yaox tix ceu kawx heue. Yam hu nawh dex Yesux, nawh ah nin, aux sawg krax phit Nawh, pa sang kieh teei Nawh yum, aux ang yaox tix ceu kawx heue. Vieang mawh nan, pwi haoh pwi hun nied tix yo lox sinum ah nin, teei Nawh yum heue.

**Krax kham geu Yesux pa sivied,
mawh sonsang luan kawn paui khaing phimap.**





Pwi pa hawt pa mawh pa meh, tak ngied ka lox Aux heue.

Mawh kheu nan, Simieang Philat teei maox pa vien: lon simaox, mai: sivied ka Yesux heue. kruh naing khankix, teei mhok kat lawm: ceep pieang kaing: Yesux heue. Khaix an kix ceep kraung sibex lang pieang Yesux heue. khaix an, kix ah lox nai ka Nawh, kawn Siyiex simieang ting kieh maix lang ju nyawm ot heue. Ki nied yo lox nunai ka Nawh heue.

MEUNG AUX ANG DEX DAWD MAI: MEUNG HAKTIEH

Kix nyax ka Yesux, mai: baig mya: tix ka pieang Nawh heue. Khaix an, kix mang: ka Yesux mai: tap toi ka Nawh heue. Yesux ah nin, Aux hoek ka pieang haktiex in, grawng sang yuh simieang heue. Vieang mawh nan, meung Aux, ang dex dawd mai: haktiex in heue. Phan Aux mawh simieang pa dex dawd mai: haktiex in, yam in, kruh naing haktiex, hoik hoek tix yuh naing plak Aux heue. Yam in, pwi pa hawt yuh ka pa mawh pa meh, tak cu ka lox Aux heue.

Simieang Philat baox ah nin ka kix, phan pex sang teei Nawh yum teei hu heue. Aux sawg ang yaox ka phimap Nawh heue. Pwi haoh pwi hun ah nin, koe been ka daux ex heue. Been an, mawh can pwi pa krai to kaux tix mawh kawn Siyiex keung tix yum tete heue.


Yam mhong simieang Philat lox pa krai pwi hun yuh nan, nawh nied tix khirhawm grawng an heue. Simieang Philat kok Yesux hu ka daux lawg, mai: chawk nawh ah nin, maix lih hoek khaing dee mawx?

TAT LOX GRAWNG: YUM YESUX

Simieang Philat veeh ngai tix plak pwi hun, mai: ah nin, aux hoik cied tix yaox ka Kaw in, mai: ang yaox phimap Nawh heue. Vieang mawh kawx nan, pwi haoh pwi hun, yo lox tix ah nin, teei Nawh yum heue teei Nawh yum pieang khaox lhak heue.

Siyiex ploi Yesux hoek, sonsang tawx to kaux tix mai: tan lu, ka son phimp kawn pwi heue.





Phan maix ruk koe sibrawm tetd, maix lih khing khaox lhak yam in heue.

Yam yao simieang Philat, grawng pa sunsang pwi haoh pwi hun khankix, nawh tat dauh rhawm tix, mai: tawx lox, kieh kix teei Yesux yum heue.

Kheu nan, kix kok Yesux hu, mai: kieh Nawh klawm khaox lhak heue. Yam hu kix kix yaox pwi tix kaux pa kaux simon, mai: khin nawh klawm khaox lhak Yesux heue. Pwi haoh pwi hun, mai: can bon pa yiem rieak khankix, hawt hu khaih Yesux heue.


Kix tawh Yesux yum ka pieang khaox lhak, mai: tawh pwi briex tau mai: nawh ra kau, plak khawn dawm tix kaux, plak khawn bex tix kaux heue. Dee tawh Yesux pieang khaox lhak, mawh pieang gawng siang kaing, pa koe plak praix veng Yeruxsaliem heue.

Yam an, Yesux rawg bwan yuh nin, simieng Siyiex pieang raoma eue, pluath ploi phimap kix lieak. Mawh khu ang kix tawng pa yuh tix mawh pa phit pa lud heue.

Yam jhak pwi haoh pwi hun ka ceu an, kruh naing khakix, cawh silhak sonsang pon goih kraung ceep Yesux ka paoh tix heue. Cao giex kaing pwi yudax khankix ah nin, kaw in, jiet chix yuh nawh krax taoh son pwi tang kaux heue. Phan Nawh rug mawh cao taoh tete, ex jhak tix yaox ka Nawh, mawh sang pon taoh Nawh ka to kaux tix lie? Ang pon taoh lie?

Yam in, maix mawh Yesux cao taoh mai: mawh simieang khrit cao taoh ka can ex khawm uik, ang mawh lie? Phan yuh nan, maix lih khaih khaox lhak yam in, phan maix yuh nan ex tak sang yum rhawm ka maix khawn uik, kix ah lox nunai ka Yesux heue.

Can pwi pa kaoh khaih tang praix, mai: hoek ka veng Yeruxsaliem khankix ah lox nunai ka Yesux ah nin, Cao taoh, kawh Siyiex, phan rug mawh pa koe sibrawm tete telai, maix lih khaih khaox lhak yam in heue.




Si'ix jhi k'ax m'p N'awh ka h'akt'ix y'p n'au h'ene. V'iang ex
 m'ai: s'ou'sang d'ou k'aw b'wi k'ham n'ik j' in l'eing j' in l'eing d'han h'ene.
 lu ka s'ou p'rim'ap k'aw b'wi, m'awh s'ou'sang lu'au k'ham p'rim'ap
 ap ka ba h'ok Y'esu t'ix k'ham g'en ka s'ou ex, m'ai: m'awh ba tan ba
 Y'esu h'ok d'iang h'akt'ix, s'ou d'rim'ap ex h'ene. Pa sang ap n'au, sang
 k'ent t'ix y'aox g'rawng in tanx tanx mox h'ene. Si'ix b'loi ka
 s'awu: ng'ie m'awh ba sang k'oe c'en h'ene. V'iang m'awh k'aw n'au,
 c'en ba k'ham ba g'en ba y'up b'wi, ex k'ham n'ik, k'awu c'en ca
 h'ok v'eeh ng'ai t'ix k'ham N'awh h'ene. Y'au y'aox N'awh t'ix k'ham: g'en
 Y'esu sang k'oe t'ix k'aw k'aw h'ene. M'awh h'ene. Ex k'ham n'ik,
 Y'esu sang k'oe t'ix k'aw k'aw h'ene. M'awh h'ene. Ex k'ham n'ik,
 k'awu c'en ca h'ene. V'iang m'awh k'aw n'au, sang k'oe c'en h'ene.
 Si'ix jhi k'ax m'p N'awh ka d'aux ba y'up N'awh n'au h'ene.

RAOMA MEUNG DAUX LAIG: PAKHWANG BWA BWA


meung keing A'ux, d'iang raoma h'ene.
 g'eeh ap n'iu ka n'awh y'au in, m'awh tak ot tan m'ai: A'ux ka d'aux
 d'iang raoma, m'awh d'oh k'ent ka aux l'ieak. Y'au an, Y'esu pa'ox
 cao ta'oh Y'esu ene, y'au h'ok m'awh ka d'aux meung keing m'awh
 k'aw h'ene. K'ham an n'awh v'eeh: ng'ai: t'ix d'ak Y'esu m'ai: ap n'iu,
 l'hat g'rawng ka Si'ix l'ie? K'aw in ang sa y'up p'rim'ap t'ix p'awg
 k'aw an, v'iang m'awh h'ok d'ex sang y'au k'aw, m'awh ang v'iang
 V'iang m'awh n'au b'wi p'rix tang k'aw t'ix k'aw, ap n'iu ka
 cao ta'oh ang m'awh l'ie? M'awh ang ta'oh ka ex y'up ka m'awh l'ie?
 d'iang k'ha'ox l'hat, ap lox n'au: y'up n'iu ka Y'esu, m'awh m'awh
 P'wi n'au b'wi hai, b'wi p'rix ba t'aw k'au m'ai: Y'esu t'ix k'aw,

YESU DUD: GAWNG

ba k'oe t'ix k'aw k'ham, h'ok t'ik h'ok t'aw k'au s'ou ex h'ene.
 Si'm'ang Si'ix k'ied m'oh ka ex t'et t'et h'ene. P'ie K'aw N'awh
 ba'ox t'ix, k'aw in rug m'awh k'aw Si'ix t'et t'et h'ene.
 c'en ba l'ih m'awh an k'ham k'ix h'ene. M'awh k'ham n'au, k'ix ap n'iu ka
 c'en k'au n'ang ba ban ka d'ee an k'ham n'ik, h'ok l'hat g'rawng ka
 Y'au an, h'akt'ix y'ang v'iang, m'ai: si'm'ang tang d'ih, m'ai: g'ieh h'ene.
 an, Y'esu pa'ox y'aox t'ix p'awg, m'ai: N'awh d'ud t'ham h'ene.
 k'ham n'ik, k'ix k'au lox l'ieak ka pa'ox t'ix, t'ix k'aw l'at t'ix k'aw, k'ham
 C'en b'wi ba m'oh lox an k'ham k'ix, k'oe k'ax l'hat k'ax g'rawng
 T'ix m'awh h'ene.
 m'ai: ap n'iu, keing A'ux Si'ix ene, A'ux ap d'oung k'ham in d'aux
 Y'au h'ok p'awg y'au lox n'iu p'ak po, Y'esu y'aox lox si'm'ang
 t'ik d'iang h'akt'ix k'ham n'ik h'ene.
 d'ou an, y'up y'au an, tom h'ok lox n'iu p'ak po, h'ok k'ham ba
 B'aw y'au j'ing si'm'ang p'ak po ng'ai, p'rix t'ik d'ou m'awh



Yam jung singaix, pa faik kheem pieang hakiex dom mawx dom an,



praix faik tom hoek plak bo 3 nari heue.

mawh paox koeng
Siyiex tix bawg dix,
kheu kawn Siyiex pa
koe tix kaux khaing ,
kham geu tix yum son
ex, kawn pwi mai:
Siyiex tom deeh khaw
caw paox tix heue. Krax
pa kham geu Yesux, pa
nu pa khawm pieang
khaox lhak, mawh pa
tawx krax taoh ju ka
kawn pwi heue.

Can kawn pwi
khawm uik khawm
leeing, hoik luan hu
singai: khaing: Siyiex
heue. Vieang ex kied lud
loe daux krax Siyiex
kawx, Siyiex hoik kieh
ex singax khaing
phimap tix heue. Can
pwi pa yum rhawm,
mai: pa rieb tix teei ka
Yesux, mawh cao pa
taoh tix khaing phimap
khawm uik, tak pon
akhwang tix mawh
kawn Siyiex heue. Jhak
heue ka daux bawg
yam pa ang ot rheung,

Yesux tak sang hoek khaing sinax pai awm: heue. Daux bawg yam an sax, kawn pwi khawm uik, khawm pwi pa taww jim rhiem ka taix Yesux kawx, tak sang yaox ka Nawh heue. Can pwi pa teh thieang: ka Nawh, mai: pa ang yum rhawm ka Nawh khankix, tak sang kaik twa, mai: lhat graung mai: yiem rieag yiem yo heue.


Khaix hoik dud rhawn Yesux, awm pa koe been pwi ceu yudax, kawn cau Nawh khankix, sau sidah bhawng mai: to kaux yum Nawh, mai: rop Nawh ka man paing heue. Mawh khu koe daux simuik rang, pa ang nyang sax sipaung pwi tix bawg kawx tan dex dee yum Yesux tix mu, kix sipaung Yesux tan, mai: thox moeng simuig ka rang ting tix mu heue. Can bon tix blah, pa hawt hu khaix kix, pa kaoh khaing meung Galilie, yaox pa hoik sipaung kix ka Yesux, mai: pa hoik thox simuig Nawh ka rang, kix deeh ing ka nyiex tix heue.

GRAUNG PA PAU KRUH NAING, KA SIMUIG YESUX

Singaix pa sax, can cao giex kaing li mai: pwi tiem lai khankix, hu ka simieang Philat mai: ah nin, kaw pa pie pa lhen in, pa mawh Yesux, doh keut ex ka lox pa hoik krai Nawh pa ah nin, khaix hoik yum Aux, daux loe singaix Aux tak sang deeh kaoh im heue. Phan mawh kawn cau Nawh pa briex tix teei Nawh, mai: pie lhen ah nin, Yesux hoik deeh kaoh im heue. Ceu pa yuh nan mawh pa sang kieh krax suksak nie lheu khaing bawg yam singaix pa hoik luan heue. Son ang sang yuh nan, tawx lox kieh pau simuig Nawh loe singaix loe sawm heue.


Yam an simieang Philat ah nin ka kix, cao pau hoik koe daux pex heue. Jawg pex pau mhawm mhawm aw awx.

Mawh khu nan, kix hu dee simuig mai: taww cum: ka rang pa hoik thox daux simuig an, son ang pwi sang pon briex tix teei, kix deuh pwi pau khankix heue.



Sipaung Yesux ka daux simuig rang heue.

Cub bon khankix, krai grawng
hoik deeh kaoh im Yesux kawx, kawx
cau khanhix ang yum rhawm kah.



BAUX 5

GRAWNG DEEH KAOK IM YESUX KHAING KRAK YUM

Khaix hoik kham: Yesux tix yum pieang khaox lhak, yam sidah loe ngaix tix ngaix, daux singaix twah, sibon ra kaux, hu tix jhak simuig Yesux heue. Tix kaux mawh marhix miex Yesux heue. Mai: tix kaux mawh Ma Rhix tang kaux heue.

Dom mawx dom an, kla reem ting tok mai: kawx cau Siyiex tix kaux hoek khaing raoma, mai: gah ka Rang pa thox moeng simuig an, mai: ngawm ka pieang rang an heue. Kraung ceep nawh toh rieang awm rawm sidap pa kied paing cawk heue. Pak ngai nawh, awm ngu sah pa ruk heue. Yam yaok kruh naing pa pau simuig ka ceu an, kix kied lhat graung tete, tom pak ngai kix hoik laux, awm laux pak ngai pwi yum heue.

Kawx cau Siyiex an, ah nin ka bon khankix, paw lhat paw graung, Aux tawng pex sawg ka Yesux pa yum pieang khaox lhak heue. Nawh ang koe ka dee in, awm pa tawm Nawh tix deuh, Nawh hoik kaoh im heue. Laig tix jhak ka dee deuh, to kaux yum Nawh heue. Hu tix krai ka kawx cau Nawh grawng pa hoik deeh kaoh im Yesux, mai: grawng pa caw tix hu rieb ka Nawh dee hoik tawm: Nawh tix deeh, ka kawx cau tix heue.

Kawx cau Siyiex baok ah nin, hoik tawng pex lie? Yesux hoik deeh kaoh im heue. Nawh ang koe daux simuig yam im ju Nawh tau mai: pex dix, Nawh krai tix deuh yuh nin, khaix hoik ap Nawh ka daux taix pwi koeng khankix, tak sang yaok tix kham geu pieang khaox lhak heue.


Vieang mawh nan, yam sidah singaix tak deeh kaoh im Yesux, pex ang doh keut ka lox pa ah Nawh lie? Cub bon khankix, doh keut dom mawx dom an, ka lox pa hoik krai Yesux heue. Vieang kix kied lhat kiied graung kawx, kix kiied koe krax gaux rhawm gaux rhi kah, mai: kix to hu krai grawng an ka cub kawm cau, ka daux veng heue. Yam nied kix tix hu daux krax, Yesux hoek sivoie kix dom mawx dom an, mai: cung tan, mai: singauh taix kix ah nin, kieh pex koe bwan son heue. Cub bon khankix, greed dex Nawh cao, mai: gruh ngawng krub sivoie Nawh heue.

Mai: Yeux ah nin ka kix, pax nied tix hu ka dee ot kawm cau khankix, mai: kieh kix nied hu ka daux meung Galilie heue.


GRAWNG PA ANG KAWN CAU YESUX TAWNG KA CEU PA DEEH KAOH IM YESUX

Mawh khu nan, cub bon khankix hu ka daux veng Yerux saliem, dom mawx dom an, sonsang krai cub kawm cau, mai: pwi tang kaux khankix mhong grawng pa deeh kaoh im Yesux khaing: daux krax yum heue. Vieang mawh kawx nan, khu grawng an, mawh awm lox lao been, kix tom ang yum rhawm ka heue. Vieang mawh kawx nan, ka daux cubcaw kawm cau, kiex pa mawh Petirux mai: Yoham, kaoh tix hu ka daux simuig heue. Yam hoek kiex daux simuig mai: laig jhak tan, kiex yax ngie man fua ka to kaux Yesux tan heue. Petirux deeh ing ka nyiex tix, mai: keut jee keut blaong daux rhawm tix heue. Vieang mawh nan, Yohan yax ka daux simuig yi, nawh yum rhawm ka heue.

Khaix an, Yohan baux yum rhawm ka grawng ceu an heue. Ceu pa hoik yax aux ka ngai, aux hoik tiem pex yax sonsang yum rhawm pex ka grawng pa lih mawh in heue.



Pex chix lhat graung yuh ka mawx? Pex chix koe rhawm ra mu yuh ka mawx? Aux ang mawh sija, pi pex yax ka Aux.



Aux hu, mai: cox dee ot son pex, khaix an aux tak deeh hoek,
mai: kok pex ing tau mai: Aux heue.

Ka daux cub bon khankix, pa to tix hu krai grawng an ka daux veng, viex kruh naing pa pau simuig tix blah, kix hu krai grawng an ka cao giex kaing pwi Yudax khankix heue. yam mhong kix ka grawh grawng hoik rug hoik kriem, cao giex kaing li khankix, kok tix yuh krax kum tix mu, son grawng pa yaox kix heue. Kix tawx mau ka kix pa pau simuig Yesux, mai: kum tix kieh kix ah nin, yam laig it yix, kawn cau Yesux hoek tix briex ka to kaux yum Yesux khaix it yix heue.

Kix pwi pau khankix ah nin, phan simieang hoek tix chawk, yix sang ah nin, grawng in, sonsang mhawm ka son pex, kix ah nan, mai: riep ti teei mau cun: praok, pa tawx ka kix sonsang kham kix sakse pa ang mawh ang meh heue.

GRAWNG PA JHI YESUX TO KAUX TIX KA KAWN CAU NAWH

Ka daux singaix pa deeh kaoh im Yesux khaing krax yum, bawg yam plak bo, cub kawn cau Nawh cao khrawm paox tix daux lawg tix mu mai: song siviex lawg, khu kied lhat kix heue. Yam an dom mawx dom an, Yesux hoek tix cung sinax kix mai: ah nin, kieh pex koe pa nhim heue.

Kawn cau Nawh cao khankix, ce Yesux mawh sijax mieang, mai: lhat graung ka nawh heue.

Yesux ah nin ka kawn cau nawh, pex chix lhat graung yuh ka mawx? Pex koe rhawm ra mu yuh ka mawx? Jhak tix yaox ka taix Aux. Vieang ka caong Aux kawx, jhak tix yaox, in mawh to kaux Aux ang mawh lie? Son pex sang tawng Aux, ang mawh sijax mieang, giex pex yaox ka Aux heue. Sijax mieang, ang koe nex, ang koe siang heue. Aux koe nex koe nham, mai: koe siang heue. Yesux nah kix yaox taix caong Tix mai: ah nin, jhak pex yaox roi khaix mat taix caong Aux heue.

Mawh kheu nan, kix gaux rhawm daox deng ka ceu an, tom ang kix hiex yum rhawm ka daux rhawm tix heue. Yam an Yesux ah nin ka kawm cau Nawh khankix, koe ceu pa ih pa un ka pex tix ceu ceu lie? Yam an, kix teei kax tong: tawx ka Yesux, mai: Nawh teei kax an, ih sivoie kix heue.

HU SIDAH HAKTIEH, KRAI KA PWI KHAWM UIK

Khaix an Yesux ah nin ka kawm cau Nawh khanix, lox krai Aux ka pex yam ot Aux tau mai: pex dix, can ceu grawh grawng Aux, pa hoik tiem cao jhai khankix tix deuh khawm uik, tak sang grum naog heue. Grawng pa sang kham geu simieang Yesux tix yum pieang khaox lhak, hoik dawg tiem tix deuh tom yam jah dix dix heue. Khaix hoik sidah 3 singaix, mawh kheu hoik deeh kaoh im Nawh khaing krax yum, grawng krax taoh pa ting bwan an, tah hu jah ka daux veng Yerusaliem, tom hoek sidah haktiex ku dah hu dec heue. Can pwi pa deeh hoek ka Aux ku kaux, tak sang pon pa plaut ploi phimap heue. Ceu pa hoik lih mawh khankix, pex hoik mawh sakse son ceu an heue.

Yan in Aux cau ka pex, mai: ploi pex hu heue. Hu ka pieang haktiex ku dah ku dee, mai: krai lox bwan gaux rhawm gaux rhi in heue. Gau pwi pa yum rhawm ka lox in, mai: pa copcom ku kaux daux pwi, tak sang luan khaing Mhawnrhok heue. Vieang mawh kawx nan, can pwi pa ang yum rhawm khankix, tak hoek daux krax kham krax geu leeing ju, kheu phimap pa yuh tix heue.

Yesux baox tawx lox satix ka kawm cau Nawh khankix ah nin, Mawh kheu pex yum rhawm ka Aux, pwi tom nie: tak sang koeng ka pex heue. Vicang mawh kawx nan, can pwi pa kaux sijax daux krax yum rhawm tom sidah, tak sang hoek krax taoh heue. Paox grawm khankix eue, can pwi pa kham sakse grawng

pa yum rhawm ka Aux, sivoie ngai pwi, Aux tak sang kham sakse grawng pa mawh nawh kaw pa dex pa dawd mai: Aux, sivoie ngai keeing Siyiex pieang raoma heue. Vieang mawh kawx nan, can pwi pa thieang tix tik ka Aux, sivoie ngai pwi, Aux kawx tak sang thieang tix tik ka nawh sivoie ngai keeing Siyiex pieang raoma heue. Vieang ka Aux kawx, yum rhawm heue. Ka daux nyiex Aux, koe dee ot tom nie heue. Aux sang hu ka dee an, mai: cox dee ot son pex heue. khaix hoik cox dee ot son pex, Aux deeh hoek mai: teei ka pex, son sang ot pex tau mai: Aux heue.

Khaix hoik deeh kaoh im Yesux khaing daux krax yum, ka daux bo singaix an, Nawh viex kawm cau Tix khankix hu pieang gawng pa koe dex veng Yerusaliem heue. Yam an, Nawh cao yaog Taix Tix, mai: nawb bwan son ka pieang kix, khaix an, bawh cao haok ka raoma, ka daux paiawm paing, tom sidah yaox Nawh pieang raoma heue.

Kawm cau Nawh khankix, hu ku dah ku dee awm lox pa hoik krai Yesux, mai: krai grawng meung Siyiex pa sang lih hoek sax heue.



Yesux tak sang hoek, mai:
siawp sibrawm, min plak ngai
pa grum naog heue.

BAUX 6

YESUX SANG DEEH HOEK TIX BAWG

Yesux mawh cao pa pluot ploi phimap kawn pwi, mai: pa tawx krax taoh ka kawn pwi, mai: Nawh mawh cao pa kwang meung haktiex pa khraox pa sang lih mawh khaix in sax heue. Nawh cao ot pieang meung raoma yam in, Vieang mawh nan, Nawh tak sang deeh hoek ka pieang haktiex in tix bawg heue.

Yam lih hoek Yesux ka pieang raoma, kawn pwi pieang haktiex, tak sang lhat graung ka ceu an heue. Can kawn pwi pieang haktiex khankix, tak sang yaox min plak ngai siawp sibrawng Nawh, ka dauw paiawm, yam lih bleeh nawh sax heue. Yam an, dauw tieak dauw tu, dauw klawng dauw ngawd, dauw tham dauw rang, sinax gawng lwa ku dah ku dee, pwi pieang haktiex khawm uik, mox tix tan: ku dah ku dee mai: ah nin mox ex khaing pa nu mai: krax prawng ciyang Siyiex heue. Pwi khawm uik yo lox sinum ah nin, yam in mawh pwi mawx, pa sang pon kham geu ka pa yuh simieang Siyiex lie?

Singaix bawg yam pa sang deeh hoek Yesux, ka pieang haktiex in tix bawg, tix prawng ciyang ka haktiex, pwi tix kaux ang pon tawng ka. Bawg yam an, Nawh hoek awm hoek pwi briex, dom mawx dom an heue. Raoma tak sang grai ghrup, kheu lox pa ting pa sinum, mai: can ku ceu khawm uik, tak sang proe ka ngu heue. Can ceu pa koe pieang haktiex mai: khawm haktiex in khawm uik kawx, tak sang hax sang gleeing khawm uik heue.

Yam an sax, ka pieang Dangngeung pa ting cie Siyiex, pwi khawm uik tak yaox, cao pa prawng ciyang ka kawn pwi khawm uik heue. Can pwi pa hoik yum khawm uik, tak sang deeh kaoh

im tau mai: can pwi pa kawn im khawm uik, kix tak sang cung sivoe Simieang Yesux khawm uik heue.

MHAWNARHOK MAI: MEUNG RAOMA

Can pwi pieang haktiex khawm uik, tak sang yaox tix kham geu awm pa yuh tix kaux pwi mawx kaux pwi an heue. Can ceu pa hoik yuh dee glip ku ceu, tak sang sidawng ka daux pa rieang, mai: pwi khawm uik tak ya ox tix kham: geu krax ciyang kheu phimap pa yuh tix kaux pwi mawx kaux pwi an heue.

Pwi laux been, pwi phit pwi vao, pwi yuh khoi yuh kluan, pwi pie pwi lhen, pwi ceu in khankix, tak sang hoek meung mhawnarhok, ka daux nhawng ngu heue. Can pwi pa ang koe ceu kaux ka daux phuklai carang pa im ju an, tak sang kham geu daux glah ngu

Mhawnarhok, mawh dee kham geu pa hax ngu leeing ju heue.



Ceu pa keut pot krox jun ex ka, mawh raoma pa khraox mai: haktiex pa khraox heue.

mhawnarhok heue. Ngu mhawnarhok, mawh ka son can satan phicaox, mai: pwi pa hawt khaix nawh khawm uik heue. mhawnarhok mawh glah ngu pa ang yeet tix bawg kawx heue.

Hoik deeh khaw caw ka Siyiex heue. Can pwi ceu an khankix, tak sang im ju daux siawp sibawm min plak ngaix, daux meung raoma, ku ju leeing ju leeing phan awm pa koe sijax mukheu Siyiex heue.

Mawh kheu Siyiex ot tau mai: ex, mai: awt tix tik rawm ngai ex khawm uik heue. Ka dee an, pa khirawm, pa laux rhawm, pa saux pa yum ang koe tix bawg kawx heue. Grawh grawng nawh, ceu an khankix tak sang grai grup hu khawm uik heue. Pa cox pa khre Siyiex tix deuh ka son pwi pa moh ka nawh khankix, mawh pa ang kawn pwi ehix mhong ka yhok, mai: ang chix yaox ka ngai, mai: ang chix keut ka daux rhawm rhi tix tix bawg kawx heue.

GRAWNG PA IM JU, DAUX MEUNG SIYIEX LEEING JU

Ex kied koe ceu pa gaux rhawm mic ding, Ex hoik lih mawh kawn daux nyiex Siyiex tix mu khaing heue. Sonsang pon ex pa im ju khaing krax yum ang ah, sonsang pon laig daux pa keh ra bawg tix bawg kheu Yesux ang ah, sonsang pon krax im ju pa grum naog, mai: pa kaux cong daux krax keut pot jun pot ang ah, mai: sonsang pon sin meung raoma pa ang chix laux, pa ang chix bheet chix laix, Siyiex mawh pa kaux cong sijax mukheu ka son ex heue. Gum lox in rug mawh lox pa mawh pa meh, mai: mawh lox pa kaux sijax heue.

Can ex pa yum rhawm ka gum lox Siyiex, ex ang lai keut pot krox jun ka ceu pa keut pot jun pot ex ka, mawh pa hoik deuh Siyiex sijax mukeu, pa mawh raoma pa khraox, mai: haktiex pa khraox heue. Mawh ngie can kix pa hoik pon krax pa ploi phimap ka nham Yesux khaing, pa pon tix yax ka raoma pa khraox mai: haktiex pa khraox heue.

Yesux tawm: tix deuh lox in, ka ang nawh nyang lih hu khaing haktiex in heue. Jhak heue. Aux tak sang hoek ka daux bawg yam pa ang ot rheung heue. Aux tak sang hoek ka daux bawg yam pa ang ot rheung heue. Aux tak sang viex pa nhim, mai: viex pa kha rhawm heue. Tak sang tawx ka kaux pwi mawx kaux pwi an, awm pa hoik yuh nawh heue.

Sivoe ang nyang luan bawgyam, viex rhawm awn rhawm tiem tix rawg bwan hoek ka Siyiex heue. Yum rhawm mai: rieb tix teei ka cao pa taoh, pa phan pa yuh pa mawh simieang Cao pa sang deeh hoek tix bawg Yesux Khrit heue. Siyiex mhong ka lox rawg maix bwan, dee ot nawh pieang meung raoma heue. Siyiex hoik tawng krax keut maix, ka daux rhawm Tix heue. Can pwi pa yum rhawm ka Yesux Khrit ku kaux, pon krax taoh leeing ju leeing phan heue.

Rieb teei krax taoh ka daux pa ang tawx ngawh.

Mawh kheu Siyiex kied moh haktiex sigrien sigre, Nawh tom tawx kawn Tix pa koe tix kaux khaing heue. Grawng pa ploi Siyiex kawn Tix pa koe tix kaux khaing, mawh sonsang hoek pwi yum rhawn ka Nawh, mai: pa rieb tix teei ka nawh khankix krax taoh, mai: pon ju leeing ju leeing phan heue. Siyiex ploi kawn Nawh hoek pieang haktiex sonsang prawng ciyang ka kawn pwi haktiex ang lai mawh. Ploi hoek sonsang hoek kawn pwi haktiex khawm uik krax taoh heue. Can pwi pa yum rhawm ka kawn Nawh uik hoex krax taoh heue. Can pwi pa yum rhawm ka kawn cao, ang hoek krax prawng krax ciyang, pwi pa ang yum rhawm ka nawh cao, kheu nawh ang yum rhawm ka kawn Siyiex pa koe tix kaux khaing, krax prawng krax ciyang hoik koe ka pieang nawh tom yamin heue.

Lox pa deuk mawh nin, vieang pa rieang hoek ka pieang hak tiex in kawx, Mawh kheu jhawm yuh kawn pwi mawh pa caox, kawn pwi kawn lheu moh pa faik khaing pa rieang heue. Can pwi pa yuh pa caox ku kaux, koeng ka pa rieang, kheu kix lhat kaing pa yuh tix sidawng:, kix ang pon hoek ka pa rieang heue. Vieang mawh kawx nan, can pwi pa yuh pa mawh pa meh kuka: ix daux pwi, hoek ka pa rieang heue.

(Lai Yohan 3:16-20)